

বাংলাদেশ মুক্তিযুদ্ধ সম্মাননা শ্রী অটল বিহারী বাজপেয়ী

সম্মাননাপত্র

ভারতের পরম শ্রদ্ধেয় রাজনৈতিক নেতা ও প্রাক্তন প্রধানমন্ত্রী শ্রী অটল বিহারী বাজপেয়ী বাংলাদেশের মহান মুক্তিযুদ্ধের সমর্থনে সক্রিয় ভূমিকা পালন করেছেন। ভারতীয় জনসংঘের সভাপতি ও লোকসভার সদস্য হিসাবে তিনি মুক্তিযুদ্ধের সপক্ষে বিভিন্ন পদক্ষেপ গ্রহণ করেন। ‘অরগানাইজার’ পত্রিকার সম্পাদকীয় নিবন্ধে শ্রী বাজপেয়ী বঙ্গবন্ধু শেখ মুজিবুর রহমানের ঐতিহাসিক স্বাধীনতার ঘোষণাকে স্বাগত জানান এবং বাংলাদেশ সরকারকে স্বীকৃতি প্রদান ও মুক্তিযোদ্ধাদের সহায়তায় এগিয়ে আসার জন্য ভারত সরকারের প্রতি আহ্বান জানান। বাংলাদেশের মুক্তিযুদ্ধের প্রতি ভারত সরকারের সমর্থন-প্রক্রিয়া ত্বরান্বিত করার দাবিতে জনসংঘ ১৯৭১ সালের ১-১১ আগস্ট তারিখে গণসত্য্যগ্রহ এবং ১২ আগস্ট তারিখে ভারতের সংসদ ভবনের সামনে বিশাল জনসমাবেশের আয়োজন করে। শ্রী বাজপেয়ী জাতীয় ও আন্তর্জাতিক পর্যায়ে বাংলাদেশ এবং এদেশের মুক্তিকামী জনতার সমর্থনে দৃঢ় অবস্থান গ্রহণ করেন।

শ্রী অটল বিহারী বাজপেয়ী ১৯২৪ সালের ২৫ ডিসেম্বর মধ্যপ্রদেশের গোয়ালিয়রে জন্মগ্রহণ করেন। স্বাধীনতা-পূর্বকালেই তাঁর রাজনৈতিক জীবন শুরু হয়। ‘ভারত ছাড়’ আন্দোলনে অংশগ্রহণের কারণে তিনি ছেফতার হন ও কারাবরণ করেন। শ্রী বাজপেয়ী ভারতীয় জনসংঘে যোগদান করেন এবং ১৯৬৮ সালে এ সংগঠনের কেন্দ্রীয় সভাপতি হন। ১৯৮০ সালে ভারতীয় জনতা পার্টি (বিজেপি) গঠনে তিনি অগ্রণী ভূমিকা পালন করেন। তিনি ছিলেন এ দলের প্রথম সভাপতি। তিনি প্রায় পাঁচ দশক যাবৎ ভারতীয় সংসদের সক্রিয় সদস্য ছিলেন। তিনি বিভিন্ন সময়ে চারটি ভিন্ন রাজ্য থেকে সাংসদ নির্বাচিত হন। শ্রী বাজপেয়ী তিন মেয়াদে ভারতের প্রধানমন্ত্রী ছিলেন। বহুমুখী প্রতিভার অধিকারী শ্রী অটল বিহারী বাজপেয়ী একজন প্রখ্যাত কবি এবং অসাধারণ বঙ্গ হিসাবে সমাদৃত। তিনি ১৯৯২ সালে ‘পদ্মবিভূষণ’ এবং ২০১৪ সালে ‘ভারতরত্ন’ পদকে ভূষিত হন। এছাড়া তিনি ১৯৯৪ সালে ‘শ্রেষ্ঠ পার্লামেন্টারিয়ান পদক’ লাভ করেন। তিনি ২০০৫ সালে রাজনীতি থেকে অবসর গ্রহণ করেন।

বাংলাদেশের মুক্তিযুদ্ধ এবং বাংলাদেশ ও ভারতের মধ্যকার বন্ধুত্বপূর্ণ সম্পর্ক সুসংহত করার ক্ষেত্রে শ্রী অটল বিহারী বাজপেয়ীর অসামান্য অবদান বাংলাদেশের জনগণ চিরদিন স্মরণ করবে।

বাংলাদেশের সরকার ও জনগণের গভীর শ্রদ্ধা ও কৃতজ্ঞতার নিদর্শন স্বরূপ শ্রী অটল বিহারী বাজপেয়ীকে বাংলাদেশ মুক্তিযুদ্ধ সম্মাননায় ভূষিত করা হল।